

Augment dals custs per la sanadad da 130%

In svilup inexplicabel

DA LUCAS DEPLAZES / ANR

■ **Dapi l'introducziun da l'obligatori per la sanadad publica èn ils custs s'augmentads massivamain. Cumbain che la chareschia resta stabila s'augmentan ils custs vinavant. Ina midada n'è betg da spetgar.** Santésuisse, l'uniun naziunala da las cassas da malsauns, ha preschentà a las medias a Berna il svilup dals custs per la sanadad publica dapi l'introducziun da l'assicuranza da malsauns l'onn 1996. Las premias che mintgin sto pajar a la cassa da malsauns saja il maletg dal svilup dals custs per la sanadad publica, quai vul dir concret: ils custs per ils medis, per ils ospitals, per ils medicaments, per ils fisioterapeuts e per ils servetschs da spitex. Dapi l'onn 1996 èn quests custs creschids per 130%, pia dapli ch'il dubel dal product naziunal brut cun il plus da 58% en quests 18 onns. Cun in augment dad 11% è la chareschia restada fitg modesta en questa fasa. In tal svilup dals custs per la sanadad publica è inexplicabel. El periclitescha la solidaritad en nossa societad sin il sector da la sanadad.

Las consultaziuns s'augmentan e custan adina dapli

Tenor Santésuisse è l'augment dal dumber da las consultaziuns e da las intervenziuns medicinalas il problem central. L'augment il pli massiv durant ils ultims diesch onns (2005–2014) ha Santésuisse constatà tar il tractament ambulat dals ospitals, numnadamain plus 66%. Il sector staziunar custa 20% dapli. Ils custs per il tractament dals medis da chasa è s'augmentà per 34%. Il dumber da las consultaziuns tar ils medis da chasa è creschì per 6%. Per 21% è s'augmentà il temp da preparaziun e da scolaziun per ils medis da chasa. Ils experts han plinavant constatà ina relaziun tranter il dumber dals medis e l'augment dals custs. Dapli medis e dapli custs! Stabils sajan restads ils custs per l'administraziun cun var 5%, ha punctuà *Verena Nold*, la direc-tura da Santésuisse.

Las consultaziuns ambulantas en ils ospitals custan actualmain 66% dapli che avant diesch onns, quai munta in

augment da las singulas premias per 253 francs. Ils custs per il tractament ambulat, quai vul dir dals medis da chasa e dal persunal en ils ospitals paja sulet il pazient. Perencunter surpiglian ils chantuns 55% dal tractament staziunar, quai vul dir per pazients che restan en l'ospital. Santésuisse vules il medem sistem da finanziaziun, che quai saja in tractament ambulat u staziunar. Santésuisse ha rapartì ils custs da l'onn 2014 da 28,7 milliardas francs sin ils divers secturs sco suonda: ospitals 11,9 milliardas francs u 41%, medis 8,5 milliardas francs u 30%. Cun 3,3 milliardas francs u 12% sajan ils custs per ils medicaments restads stabils, 17% u 4,9 milliardas francs pertutgan ils ulteriurs secturs.

Grondas differenzas

Las retschertgas da Santésuisse demussan marcantas differenzas tranter ils divers chantuns, dentant er tranter las aglomeraziuns e las regiuns ruralas. Muntan ils custs per la sanadad publica per persuna l'onn 2014 en il chantun Appenzell a 2692 francs pajan ins a Basilea-Citad 4504 francs. Ils custs per ils Grischuns èn cun var 3000 francs sut la media svizra. Ils custs per la sanadad publica muntian ina greva chargia, spezialmain per persunas cun entradas modestas e mesaunas, ha punctuà Nold e fatg attent che ina assicuranza che la populaziun na possa betg pli pajar perdia ina impurtanta funcziun sociala.

Reglar da nov la finanziaziun

Tenor Santésuisse duess ins procurar per il medem sistem da finanziaziun tranter il tractament ambulat ed il tractament staziunar (dimora en l'ospital). Gia dadi pretendia Santésuisse la dismessa da l'obligaziun da contractar cun mintga medi e da reducir las controllas dublas dals chantuns. Plinavant saja necessari d'examinar pli sever las prestaziuns tenor ils criteris fixads en la lescha: effect, cunvegnet ed economic. La finanziaziun dals ospitals sin fundament da las pauschalas per cas – introducidas l'onn 2012 – haja provotgà l'emprim mument in augment dals custs. Dentant han ins constatà ina tscherta stabilisaziun.